

## JONES, BENJAMIN (1756 - 1823), gweinidog gyda'r Annibynwyr

**Enw:** Benjamin Jones  
**Dyddiad geni:** 1756  
**Dyddiad marw:** 1823  
**Rhyw:** Gwryw  
**Galwedigaeth:** gweinidog gyda'r Annibynwyr  
**Maes gweithgaredd:** Crefydd  
**Awdur:** Richard Griffith Owen

Ganwyd yn Trecyrfawr, Llanwinio, Sir Gaerfyrddin, 29 Medi 1756. Eglwyswyr cefnog oedd ei deulu â'u bryd ar iddo gymryd urddau eglwysig. Addysgwyd ef i ddechrau gan glerigwr yn ysgol Llanddewi-efelffre, Sir Benfro. Daeth dan ddylanwad [Richard Morgan](#), Henllan, a [John Griffith](#), Glandwr, a wnaeth iddo droi at yr Annibynwyr; ymaelododd yn eglwys Henllan ac yno y dechreuodd bregethu yn 18 oed. Yn 1775 aeth i athrofa y Fenni; urddwyd ef yn 1779 yn weinidog eglwys Pencader. Yn 1784 symudodd i Fôn i ofalu am eglwysi Rhosymeirch a Chapel Mawr; yn 1789 aeth i Benlan, Pwllheli.

Bu ei weinidogaeth ym Môn yn achlysur i gychwyn amryw achosion megis y Talwrn, Amlwch, a Biwmares, ond wedi symud i Bwllheli nid ymddengys iddo ymddiddori cymaint mewn sefydlu achosion yn y wlad oddi amgylch. Cyfrifid ef yn ddiwinydd craff ac yn wr o gyngor gyda'r blaenaf ymhlith gweinidogion y Gogledd. Bu cysylltiad agos rhyngddo ef a'i deulu â 'Helynt Fawr' Llanuwchllyn yn adeg [Michael Jones](#) (gweler *Hanes Cynulleidfa Hen Gapel Llanuwchllyn*, pen. v). O dan ei weinidogaeth ef, ar Sul y Pasg 1796, yng nghapel Pendref, Llanfyllin, y dwysbigwyd [Ann Griffiths](#), emynyddes Cymru.

Tua 1805, cyhoeddodd *Ffynhonnau Iachawdwriaeth* i ateb John Wesley yn ei draethawd ar etholedigaeth. Cyhoeddodd hefyd lyfryn galluog ar *Athrawiaeth y Drindod mewn Tair Pregeth* i wrthwynebu rhai o syniadau [Peter Williams](#) ar y *Beibl* ac yn enwedig ei ddaliadau Sabelaidd yn ei lyfr *Dirgelwch Duwioldeb*, 1792 (gweler *Cofiant J. Jones, Talsarn*, 302-3). Bu farw 17 Chwefror 1823 a chladdwyd ef ym mynwent Penlan, Pwllheli.

### Awdur

Y Parchedig Richard Griffith Owen, (1890 - 1973)

### Ffynonellau

*Hanes Eglwysi Annibynnol Cymru*, iii, 169

R. T. Jenkins, *Hanes Cynulleidfa Hen Gapel Llanuwchllyn* (1937), 101, 105, 112, 147, 176

Owen Thomas, *Cofiant y Parchedig John Jones, Talsarn* (Efrog Newydd 1868), 302-3

*Album Aberhonddu ... o'r flwyddyn 1755 hyd 1880* (1898), 21-2

### Darllen Pellach

T. Lewis, '[Cofiant Y Diweddar Barch. Benjamin Jones, Pwllheli, Swydd Gaerynarfon](#),' *Y Dysgedydd Crefyddol*, Cyf.V rhif.7, Gorffennaf 1826, tt.193-197

Erthygl Wicipedia: [Benjamin Jones, Pwllheli](#)

### Dolenni Ychwanegol

VIAF: [31863889](#)

Wikidata: [Q20732652](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng

Nghymru a thu hwnt.

Ewch i'n [tudalen codi arian](#) am ragor o wybodaeth.

